

四庫全書

史部

欽定四庫全書

欽定續文獻通考卷二百三十九

四裔考

南夷

安南

宋理宗景定三年安南國王陳日吳表請世襲從之

先是安南國王李氏自公蘊至吳日凡八傳二百二十餘年寧宗嘉定時吳日無子遂為其婿陳日吳有

其國而國亡至是年乞世襲帝從其請度宗咸淳五年八年與其子威見各加食邑賜鞍馬等物

元世祖中統二年封日暎子光曷為安南國王

初憲宗七年十二月遣兵攻安南烏蘭哈達等兵水陸並進入其國日暎竄海島屠其城以氣候鬱熱乃班師八年二月日暎傳位於長子光曷遣使諭之遂納款至是封光曷為國王至元四年詔諭六事一君長親朝二子弟入質三編民數四出軍役五輸納稅

賦六仍置達嚕噶齊統治之十四年光弼既沒其子
日烜不請命而自立遣使徃召以疾為辭又聞其通
謀占城遣兵應援遂進兵攻之日烜棄城遁十五年
遣禮部尚書柴椿等使安南國詔切責之仍俾其來
朝二十五年日烜遣使謝罪二十七年日烜卒子日
燭立三十年以徵日燭入朝不至又議征之次年成
宗即位命罷征武宗至大四年八月其世子陳日賓
遣使奉表來朝仁宗皇慶二年正月交趾軍犯鎮安

州等處命牒諭安南國秦定帝秦定元年世子日曠
遣陪臣來文宗天歷三年四月世子日準亦遣使來
元史列傳曰至元二十二年日烜弟昭國王陳益
稷率其本宗與其妻子官吏自拔來歸仍其封久
居於鄂成宗朝賜田二百頃文宗天歷二年夏卒
壽七十有六至順元年謚忠懿

明太祖洪武元年命使招諭安南

時安南王陳日烜聞廖永忠定兩廣將遣使納款帝

命漢陽知府易濟招諭之次年安南遣使至命侍讀
學士張以寧等往封日燿為王比至日燿先卒姪日
燿嗣位時安南占城構兵帝命使諭令罷兵兩國皆
奉詔明年別遣使封日燿為王四年冬日燿為伯父
叔明逼死七年叔明自稱年老乞命弟端攝政十年
端侵占城敗沒弟煒代立二十一年國相黎季犛竊
柄廢其主煒尋弑之立叔明子日焜主國事越數年
中朝始覺命絕其使二十八年季犛告前王叔明之

訃帝以叔明本篡弑弔祭則獎亂止不行移檄使知之惠帝建文元年李聲弑日焜立其子顯又弑顯立其弟竇方在襁褓中復弑之大弑陳氏宗族而自立更姓名為胡一元名其子蒼曰胡奎謂出帝舜裔胡公後僭國號大虞年號元聖尋自稱太上皇傳位奎朝廷不知也

成祖永樂元年遣使封胡奎為安南國王

奎既自署權理安南國事奉表言高皇帝時安南王

日燿率先輸誠不幸早亡嗣絕臣陳氏甥為衆所推
於今四年望賜封爵帝命勅諭其陪臣父老凡繼嗣
之有無推載之誠偽具以實聞既而奎遣使進陪臣
父老所上表如奎所以誑帝者乃遣使封之然帝其
國中自若也帝又惡其侵奪思明逼掠占城方遣官
切責而故陪臣裴伯耆詣闕告難又老撾送陳天平
至

天平前王日烜孫
天明子日燿弟也

言黎賊盡滅其族後裔止天平

一人與賊不共戴天乞迅發師用章天討奎方遣使

金史卷一百一十三
賀正旦帝出天平示之皆錯愕下拜有泣者伯耆責
其使以大義惶恐不能答帝以奩父子悖逆三年命
官齎勅責奩令具篡弑之實以聞奩遣其臣入朝謝
罪祇言未嘗僭號改元請迎天平歸奉為王帝不虞
其詐乃令天平還國以兵五千送之四年三月護天
平入雞陵關將至芹站奩伏兵邀殺天平帝大怒決
意討之七月命督師南征征夷將軍張輔等分道進
兵所至皆克十二月拔多邦城遂擣東都據之焚賊

西都賊走入海五年正月大破季犛於木九江宣詔
訪求陳氏子孫耆老千餘詣軍門言陳氏為黎賊殺
盡無可繼者安南本中國地乞仍入職方同內郡
五月獲季犛及偽太子安南盡平

五年六月詔改安南為交趾設郡縣

從耆老言乃設布都按三司以都督僉事呂毅等為
之設交州北江等十五府分轄三十六州一百八十
一縣又設太原宣化等五州直隸布政司分轄二十

九縣其地要害咸設衛所控制之陳氏被害者贈卹之軍民死亡暴露者瘞埋之居官者仍其舊與新除者參治黎氏苛政一切蠲除遭刑者悉放免禮待高年碩德鰥寡孤獨無告者設養濟院懷才抱德者敦遣赴京又詔訪求山林隱逸明經博學下及方技等凡奏舉九千餘人

六年六月征夷將軍張輔等振旅還京上交陞地圖其地東西一千七百六十里南北二千八百里安撫

人民三百一十二萬有奇獲蠻人二百八萬七千五百有奇象馬牛二十三萬五千九百有奇米粟一千三百六十萬石船八千六百七十餘艘軍器二百五十三萬九千八百於是大行封賞及叙賚有差

七年二月復命英國公張輔帥師討交趾賊

時中朝所置吏務以寬厚輯新造而蠻人自以非類數相驚恐陳氏故官簡定與化州偽官鄧悉阮帥等謀亂定乃僭大號紀元興慶國曰大越伺大軍還即

出扼三江府寇交州近境皆響應守將出討無功命
沐晟為征夷將軍與賊戰於生厰江大敗乃勅輔統
兵討之先敗賊於鹹子關又敗之於太平海口時阮
帥等推簡定為太上皇別立陳季擴為帝改元重光
乃遣使自稱前安南王孫求封爵輔叱斬之進兵抵
清化水陸軍會定及偽將相等俱就禽晟追季擴至
靈長海口季擴大蹙奉表乞降帝心知其詐姑許之
詔授交趾布政使其黨阮帥等各授以官賊究無悛

心復命輔督軍合晟軍討之禽李擴他賊盡平十三年班師入京復命輔出鎮十四年召還明年命豐城侯李彬代之交人故好亂時中官馬騏以採辦至大索境內珍寶人情騷動桀黠者鼓煽之大軍甫還即並起為亂彬遣將討滅之而反者猶不止彬東西征

討日不暇給中朝以叛寇潘僚

僚故又安知府李祐子嗣父職不堪驍虐

遂黎利

利初仕黎季擴為金吾將軍後歸正用為清化府僦樂縣巡檢邑邑不得志大軍還遂反

借稱平

車三

三四忙故知縣車綿之子

儂文歷等久未平命榮昌

伯陳智助之又降勅責彬連奏蕩平彬惶恐督師追勦十九年秋賊悉破滅惟黎利竄老撾不能得二十年春彬卒詔智代彬二十二年秋榮昌伯陳智奏利初逃老撾後被逐官軍追擊雖求撫而造軍器未已必當進兵會仁宗以踐阼大赦天下因勅智善撫之而利已寇茶籠州時中官山壽言利未叛壽方鎮守與已相信今往諭之必來歸遂遣壽齎勅授清化知府勅甫降利已寇清化及得勅即借撫愚守臣佯言

秋涼赴官而寇掠不已仁宗洪熙元年二月頒榮昌
伯陳智征夷副將軍印又命安平伯李安至交趾佐
之智素無將畧因借撫賊以愚中朝且與都督方政
迂遂頓兵不進賊益無所忌再圍茶籠城中糧盡奏
至而帝崩宣宗初即位勅責智及三司官智等不為
意茶籠陷尚書陳洽奏聞降勅切責期來春平賊智
始懼與政薄可留關敗還至茶籠又敗政寡謀多忌
素不相能而山壽專招撫擁兵又安不救是以屢敗

宣德元年命成山侯王通等討之又詔大赦交趾罪人
通素庸劣一戰而敗不奉朝命擅割清化以南地予
賊盡撤官吏軍民還東關帝聞通敗大駭命安遠侯
柳升及沐晟等兩路進兵復勅王通固守俟諸軍集
至二年四月賊懼大軍至致書請和九月諸軍始抵
隘留關利既與通有成言乃詭稱陳氏有遺嗣蒿乞
罷兵立其後裔帝心知為詐欲藉此息兵遂納其言
宣宗宣德二年十一月遣使撫諭安南盡撤軍民北還

初帝嗣位即欲棄交趾及利與暹表至示諭廷臣以
罷兵意楊士奇楊榮力贊之惟蹇義夏原吉不可然
意已決廷臣不敢爭至是命使齎詔盡赦安南民人
罪令具陳氏後人之實以聞因勅利以興滅繼絕意
并諭王通北還詔未至通已棄交趾由陸路還廣西
中官山壽馬騏及三司守令由水路還欽州凡得還
者止八萬六千人為賊所殺及拘留者不可勝計天
下舉疾通棄地殃民而帝不怒也

六年六月遣使齎勅印命黎利權署安南國事

利於三年奉表詭言罽於正月物故陳氏子孫絕國
人推利守其國謹俟朝命帝亦知其詐不欲遽封屢
以訪陳氏裔還中國遺民二事勅諭之至是以二事
飾詞對復進頭目耆老奏仍為利乞封乃有是命至
八年利卒利雖受勅命其居國稱帝紀元順天建東
西二郡分十三道各設官擬中國三司東都在交州
府西都在清華府置百官設學校以經義詩賦二科

取士彬彬有華風僭位六年私謚太祖子麟繼遣使
告訃即勅麟權署國事

臣等謹按麟一名龍自是其君長皆有二名以一
名奏天朝互見土貢考

英宗正統元年閏六月遣使齎勅印封黎麟為安南國
王

帝以陳氏宗支既絕欲使麟正位下廷議咸以為宜
遂命封之至七年麟卒私謚太宗改元二紹平六年

大寶三年子濬繼一名基隆遣使告訃封為國王濬
遣將侵占城奪新州港據其王掠人口至三萬三千
餘景泰元年賜勅戒濬迄不奉詔至天順三年十月
其庶兄諒山王琮弑之而自立濬改元二大利十一
年延寧六年私謚仁宗琮一名宜民篡位九月改元
天興為國人所誅以濬弟灝繼灝一名思誠六年封
為國王至孝宗宏治十年灝卒私謚為聖宗改元二
光順十年洪德二十八年子暉繼一名鎔十七年暉

卒私謚憲宗改元曰景統子湊繼一名敬甫立七月而卒私謚肅宗弟誼繼一名璿至武宗正德元年冊誼為安南王誼寵任母黨阮种阮伯勝兄弟恣行威虐屠戮宗親醜殺祖母种等怙寵竊權四年逼誼自殺擁立其弟伯勝國人黎廣等討誅之立灝庶子暉誼在位四年改元端慶暉一名澄七年受封多行不義十一年社堂燒香官陳萬作亂殺暉而自立詭言前王陳氏後仍稱大虞皇帝改元應天明臣都力士

莫登庸初附暹後與黎氏大臣阮宏裕等起兵討之
暹敗奔諒山道據地自保登庸乃共立暎兄灝之子
暎暎在位七年改元洪順暎徒擁虛位登庸握兵柄
潛蓄異志黎氏臣鄭綏別立其族子酉榜發兵攻都
城暎出走登庸擊破綏兵捕酉榜殺之益恃功專恣
遂逼妻暎母迎暎歸十六年率兵攻陳暹暹敗走死
旋謀弑暎暎奔清華登庸立其庶弟應遷居海東長
慶府

世宗嘉靖十八年安南莫方瀛上表乞降

先是六年安南莫登庸令其黨偽為黎應禪詔篡其位改元明德立子方瀛為皇太子旋酖殺應九年禪位於方瀛自稱太上皇移居都齊海陽為方瀛外援作大誥五十九條頒之國中方瀛改元大正其年九月黎諲卒於清華國七十五年帝以安南叛逆宜遣官往勘并議征討十六年安南黎寧遣國人鄭惟僚等備陳登庸篡弒狀言寧即諲子諲卒國人立寧為

世孫權主國事屢赴邊告難俱為登庸邀殺乞師亟
除賊八月雲南巡撫汪文盛謂登庸必可破即傳檄
安南登庸父子乃具表乞降而黎寧懼天朝竟納其
降備以本國篡弑始末及軍馬之數水陸進兵道里
來上俱下廷臣議不能決至是年方瀛又上表降並
籍其土地戶口聽天朝處分凡為府五十有三州四
十有九縣一百七十有六帝納之

十九年命削安南國為安南都統使司改十三道為十

三宣撫司

時方瀛卒登庸率從子文明等入鎮南關囚首徒跣
匍匐叩頭請奉正朔永為藩臣事聞帝大喜故有是
命又命覈黎寧真偽果黎氏後割所據四府奉其祀
寧否則已之二十二年登庸卒方瀛子福海嗣二十
五年福海卒子宏漢嗣宏漢初立時其國內亂名分
未定命守臣覈所當立者至三十年事白乃命授為
安南都統使四十三年宏漢卒子茂洽嗣萬厯元年

授都統使時莫氏漸衰黎氏復興互相構兵國益多故
始黎寧據清華仍僭帝號以嘉靖九年改元為元和
居四年為登庸所攻竄占城界國人立其弟憲改元
光緒十五年廉知寧所在迎歸清華後遷於淶馬江
寧卒其臣陳檢立寧子寵寵卒無子國人共立黎暉
曰世孫維邦維邦卒檢子松立其子維潭世居清華
自為一國

神宗萬曆二十五年詔授黎維潭安南都統使

先是十九年維潭漸強舉兵攻莫茂洽茂洽敗奔喜
林縣二十年其臣鄭松誘土人內應維潭襲殺之奪
其印親黨多遇害有莫敦讓者奔防城告難松復禽
敦讓勢益張茂洽子敬恭與宗人履遜等奔廣西思
陵州履城奔欽州獨莫敬邦有衆十餘萬起京北道
衆乃推敬邦署都統黎兵攻南策州敬邦被殺莫氏
勢益衰竄至龍州憑祥界令土官列狀告當事維潭
亦叩關求通貢二十一年廣西巡撫陳大科等上言

蠻邦易姓如奕棋不當以彼之叛服為順逆止以彼之叛我服我為順逆今維潭雖圖恢復而茂洽固天朝外臣安得不請命而惻然戮之竊謂黎氏擅興之罪不可不問莫氏子遺之緒亦不可不存請聽黎氏納款而仍存莫氏比諸漆馬江亦不剪其祀於計為便廷議如其言至是款儀既成詔授維潭都統使一如莫氏故事自是安南復為黎氏有而莫氏但保高平一郡二十七年維潭卒子維新嗣鄭松專其柄會

叛酋潘彥構亂維新與松移保清化三十四年命授
黎維新安南都統使時莫氏宗黨多竄處海隅往往
僭稱公侯伯名號侵軼邊境維新亦不能制守臣檄
問數發兵夾勦雖應時破滅而邊方頗受其累維新
卒子維祺嗣天啟四年發兵擊莫敬寬克之敬寬與
次子逃入山中復回高平勢益弱終明之世兩姓分
據終不能歸於一

明史安南傳曰安南都會在交州即唐都護治所

其疆域東距海西接老撾南渡海即占城北連廣
西之思明南寧雲南之臨安元江土膏腴氣候熱
穀歲二稔人性獷悍驩演二州多文學交愛二州
多僦儻士較他方為異

占城 窟童龍附

元世祖至元十九年十月命右丞索多等即占城地立
省以安撫之

先是十五年索多以宋平遣人至占城回言其王有

內附意詔降虎符授榮祿大夫封占城郡王十六年
十二月遣使與索多等諭其王入朝十七年二月奉
表降至是朝廷以占城國主字由補喇者吾曩歲遣
使來朝稱臣內屬遂有是命既而其子補的專國負
固不服并執我使舟經其地者乃遣兵征之二十年
正月三道夾攻國主敗走鴉候山立砦聚兵終不能
克

臣等謹按元史外夷傳占城乍臣乍叛已詳載土

貢考矣考明史外國傳占城居南海中自瓊州航海
順風一晝夜可至自福州西南行十晝夜可至即
周越裳地秦為林邑漢為象林縣後漢末區連據
其地始稱林邑王自晉至隋仍之唐時或稱占不
勞或稱占婆其王所居曰占城至德後改國號曰
環迄周末遂以占城為號朝貢不替元世祖惡其
阻命大舉兵擊破之亦不能定也

明太祖洪武二年遣官以即位詔諭占城國

時其王阿荅阿者先已遣使來朝尋命使齎詔封為
占城國王三年遣使往祀其山川頒科舉於其國自
後占城與安南國屢構兵天子輒遣使諭解之十年
與安南王陳煊大戰煊敗死二十一年阿荅阿者失
道大臣閻勝懷不軌謀二十三年弑王自立永樂十
三年王師方征陳季擴命占城助兵尚書陳洽言其
王侵升華府所轄四州十一縣地厥罪維均亦宜討
之帝以交趾初平不欲勞師但賜勅切責正統六年

王占巴的賴卒封其孫摩訶賁該為王十二年王與
安南戰大敗被執故王占巴的賴姪摩訶貴來遣使
奏先王抱疾曾以臣為世子欲令嗣位臣時年幼遜
位於舅氏摩訶賁該今被禽國人以有遺命請臣代
位候朝命乃遣使封為王景泰三年卒封其弟摩訶
貴由為王天順二年王摩訶槃羅悅新立四年九月
使來告喪命封其弟槃羅茶全為王成化五年安南大
舉伐占城七年破占城執槃羅茶全其弟槃羅悅

告難八年遣使往封則其國已為安南所據改為南
交州十年安南復遣兵執槃羅茶悅立前王孫齋亞
弗菴為王以國南邊地予之十四年以請封遣使至
占城占城人言王孫請封之後即為其弟古來所殺
安南以偽勅立其國人提婆苔為王矣十七年古來
遣使言安南破臣國時故王槃羅茶悅逃居佛靈山
臣與兄齋亞麻安弗潛竄山谷後賊人畏天威遣人
訪覓臣兄還以故地然自邦都朗至占臘止五處臣

兄權國未幾隕歿臣當嗣立所有土地本二十七處
四府一州二十二縣東至海南至占臘西至黎人山
北至阿本喇補凡三千五百餘里乞諭交人盡還本
國乃召問其使臣云古來寶王弟其王病死非弑提
婆皆不知何人二十年遣使封古來為國王并傳諭
古來詣廣東受封二十三年遣大臣護之還國宏治
十八年古來卒其子沙古卜洛不告父喪但乞命大
臣至其國仍以安南所侵新州港諸地封之為詞廷

議不久至正德五年復請封所遣使憚於行請如往年古來故事令其使臣齎勅往嘉靖二十二年貢使訴安南侵擾道阻難歸乞遣官護送還國報可自後不復來

明史占城傳曰國無霜雪四時皆似夏草木常青民以漁為業無二麥力穡者少故收穫薄國人皆食檳榔終日不離口不解朔望但以月生為初月晦為盡不置閏分晝夜為十更非日中不起非夜

分不卧見月則飲酒歌舞為樂無紙筆用羊皮搥
薄熏黑削細竹蘸白灰為字狀若蚯蚓有城郭甲
兵人性狠而狡貿易多不平戶皆北向民居悉覆
茅檐高不得過三尺部領分差等門高卑亦有限
飲食穢污魚非腐爛不食釀不生蛆不為美人體
黑男蓬頭女椎結俱跣足王鎖里人崇釋教歲時
采生人膽入酒中與家人同飲且以浴身曰通身
是膽其國人采以獻王又以洗象目每伺人於道

出不意急殺之取膽以去若其人驚覺則膽已先
裂不足用矣置衆膽於器華人膽輒居上故尤貴
之五六月間商人出必戒備王在位三十年則避
位入深山以兄弟子侄代而已持齋受戒告於天
曰我為君無道願狼虎食我或病死居一年無恙
則復位如初國中呼為昔嚟馬蛤刺乃至尊至聖
之稱也國不甚富惟犀象最多烏木降香樵以為
薪棋枰香獨產其地一山酋長遣人守之民不得

采犯者至斷手有鰐魚潭獄疑不決者令兩造騎
牛過其旁曲者魚輒躍而食之直者即數往返不
食也有尸頭蠻者一名屍致魚本婦人惟無瞳神
為異夜中與人同寢忽飛頭食人穢物來即復活
若人知而封其頸或移之他所其婦即死國設厲
禁有而不告者罪及一家

又賓童龍國傳曰其國與占城接壤或言如來入
舍衛國乞食即其地氣候草木人物風土大類占

城惟遭喪能持服葬以僻地設齋禮佛婚姻偶合
簡出入乘象或馬從者百餘人前後讚唱民編茅
覆屋皆用金銀花布有崑崙山節然大海中與占
城及東西竺島峙相望其山方廣而高其海即曰
崑崙洋諸往西洋者必待順風七晝夜始得過故
舟人為之諺曰上怕七州下怕崑崙針迷舵失人
船莫存此山無異產人皆穴居巢處食果實魚蝦
無室廬井竈

真臘

宋寧宗慶元中真臘滅占城并有其地

時改其國名曰占臘至元代仍稱真臘

臣等謹按馬端臨考不載改名占臘事元史亦無事可見

明太祖洪武三年遣使齎詔撫諭真臘

四年其國巴山王忽爾那遣使進表朝貢十六年遂遣使齎勘合文冊賜其王參荅甘武者持達志凡國

中使至勘合不符者即屬矯偽許繫縛以聞十九年
賜之印永樂三年遣使告喪命官往祭并封其王參
烈婆毘牙子參烈昭平牙為王其國數被占城侵擾
帝勅占城王罷兵修好景泰後其使不常至

明史真臘傳曰在占城南順風三晝夜可至其國
城隍周七十餘里幅員廣數千里國中有金塔金
橋殿宇三十餘所王歲時一會羅列玉猿孔雀白
象犀牛於前名曰百塔洲盛食以金盤金碗故有

富貴真臘之諺民俗富饒天時常熱不識霜雪未
一歲數稔男女推結穿短衫圍梢布刑有劓剕刺
配盜則去手足番人殺唐人罪死唐人殺番人則

罰金無金則鬻身贖罪

唐人者諸番呼華人之稱也凡海外諸國皆然以

十月為歲首閏悉用九月夜分四更亦有曉天文
者能算日月薄蝕其地謂儒為班詰僧為苧姑道
為八思班詰不知讀何書由此入仕者為華貫先
時項掛一白線以自別既貴曳白如故俗尚釋教

僧皆食魚肉或以供佛惟不飲酒其國自稱甘孛
智後訛為甘破蔗萬厯後又改為東埔寨

滿刺加

明成祖永樂元年十月遣中官尹慶使滿刺加

其地無王亦不稱國服屬暹羅歲輸金四十兩為賦
慶至宣示威德及招徠意其酋拜里迷蘇刺大喜遣
使至京帝嘉之封為滿刺加國王其使者言王慕義
願同中國列郡請封其山為一國之鎮御製碑文勒

山上未綴以詩九年王率妻子陪臣來朝宴賜甚厚
十二年王子母幹撒于的兒沙來朝告其父訃即命
襲封十七年率妻子陪臣來朝并訴暹羅見侵狀帝
賜勅諭暹羅二十四年西里麻哈刺以父歿嗣位來
朝宣德六年暹羅謀侵其國遣使三人附蘇門答刺
貢舟入訴復使齎勅諭暹羅正統十年從其使者請
賜王息力八密息瓦兒丟八沙護國勅書及蟒服傘
蓋以鎮服國人又王欲親詣闕下從人多賜一巨舟

以便遠涉景泰六年封速魯擅無咎佛哪沙為王天
順三年封其王子蘇丹芒速沙成化十七年封王子
馬哈木沙為王正德末佛郎機強舉兵侵奪其地王
蘇端媽未出奔遣使告難時世宗嗣位勅責佛郎機
令還故土諭暹羅諸國王以救災恤隣之義迄無應
者滿剌加竟為所滅後改名麻六甲

明史滿剌加傳曰在占城南順風八日至龍牙門
又西行二日即至或云即古頻遜唐哥羅富沙有

山出泉流為溪土人淘沙取錫煎成塊曰斗錫田
瘠少收民皆淘沙捕魚為業氣候朝熱暮寒男女
椎結身體黝黑間有白者唐人種也俗淳厚市道
頗平自為佛郎機所破其風頓殊商舶稀至多直
詣蘇門答剌然必取道其國率被邀劫海路幾斷
其自販於中國者則直達廣東香山澳接跡不絕
云

彭亨

柔佛丁機宜附

明太祖洪武十一年彭亨王麻哈刺惹荅饒遣使齎表
來朝

至永樂九年復遣使至其王名巴刺密瑣刺達羅息
泥十年十四年兩遣鄭和報之

明史彭亨傳曰彭亨

一作滄亨
一作彭坑

在暹羅之西其國

土田沃氣候常溫米粟饒足煮海為鹽釀椰漿為
酒上下親狎無寇賊然惑於鬼神刻香木為像殺
人祭賽以禳灾祈福至萬厯時有柔佛國副王送

其子至彭亨娶王女王置酒親戚畢會婆羅國王
子為彭亨王妹婿舉觴獻副王而手指有巨珠甚
美副王欲之許以重賄靳不與副王怒即歸國發
兵來攻彭亨人出不意不戰自潰王與婆羅王子
奔金山淳泥國王

彭亨國王
妃兄也

率衆來援副王乃大

肆焚掠而去當是時國中鬼哭三日人民半死淳
泥王迎其妹歸彭亨王隨之而命其長子攝國已
王復位次子素凶悍遂毒殺其父弑其兄自立

又柔佛傳曰柔佛近彭亨一名烏木礁林永樂中
鄭和遍歷西洋無柔佛名或言和曾經東西竺山
今此山正在其地疑是東西竺萬歷間其酋好構
兵隣國丁機宜彭亨屢被其患華人販他國者多
就之貿易時或邀至其國國中覆茅為屋列木為
城環以池無事通商於外有事則召募為兵稱強
國焉地不產穀常易米於隣壤男子薙髮徒跣佩
刀女子蓄髮椎結其酋則佩雙刀字用茭葦葉以

刀刺之婚姻亦論門閥王用金銀為食器羣下則用磁無七筋俗好持齋見星方食節序以四月為歲首居喪婦人薙髮男子則重薙死者皆火葬所產有犀象玳瑁片腦沒藥血竭錫蠟嘉文簞木棉花檳榔海菜燕窩西國米菴吉柿之屬始其國吉寧仁為大庫忠於王為王所倚信王弟以兄疏已潛殺之後出行墮馬死左右咸見吉寧仁為祟自是家家祀之

又丁機宜傳曰瓜哇屬國也幅幘甚狹僅千餘家
柔佛黠而雄丁機宜與接壤時被其患後以厚幣
求婚稍獲寧處其國以木為城酋所居旁列鐘鼓
樓出入乘象以十月為歲首性好潔酋所食啖皆
躬自割烹民俗類瓜哇物產悉如柔佛酒禁甚嚴
有常稅然大家皆不飲惟細民無籍者飲之其曹
偶咸非笑婚者男往女家持其門戶故生女勝男
喪用火葬華人往商交易甚平自為柔佛所破往

者亦鮮

巴喇西

明武宗正德六年巴喇西遣使臣來朝

其國在南海去中國絕遠使臣沙地白自言始奉王命舟行四年半遭風飄至西瀾海舟壞止存一小艇又飄流八日至得吉零國居一年至秘得居八月乃遵陸行閱二十六日抵暹羅以情告王獲賜日給且賜婦女四人居四年迄今年五月始附番舶入廣東

得達闕下

阿魯

明成祖永樂九年阿魯王速魯唐忽先遣使來朝

時附古里諸國至

見土貢考

十七年王子段阿剌沙遣使

來

明史阿魯傳曰阿魯亦名亞魯近滿剌加順風三

日夜可至風俗氣候大類蘇門答剌田瘠少收盛

藝芭蕉椰子為食男女皆裸體以布圍腰

臣等謹按王圻續考阿魯後載九州山謂與滿剌
加隣其山產沉香黃熟香永樂七年鄭和往諭諸
番遣官兵入山採香得徑八九尺長六七丈者六
株香味清遠黑花細紋其山人皆駭歎天朝之兵
威力若神考明史亦不載

欽定續文獻通考卷二百三十九

欽定四庫全書

欽定續文獻通考卷二百四十

四裔考

西南夷

明太祖洪武初西南夷來歸者即用原官授之

其土官銜號曰宣慰司曰宣撫司曰招討司曰安撫
司曰長官司以勞績之多寡分尊卑之等差而府州
縣之名亦往往有之

明史土司傳曰西南諸蠻有虞氏之苗裔之鬼方
西漢之夜郎靡莫邛作焚爨之屬皆是也自巴夔
以東及湖湘嶺嶠盤踞數千里種類殊別歷代以
來自相君長原具為王朝役使自周武王時孟津
大會而庸蜀羌髳微盧彭濮諸蠻皆與焉及楚莊
躡王滇而秦開五尺道置吏沿及漢武置都尉縣
屬仍令自保此即土官土吏之所始歟迨有明踵
元故事大為恢拓分別司郡州縣額以賦役聽我

驅調而法始備然其道在於羈縻彼大姓相擅世
積威約而必假我爵祿寵之名號乃易為統攝故
奔走惟命然調發日繁急而生變恃功怙過侵擾
益深故厯代徵發其害各半要在於撫綏得人恩
威兼濟則得其死力而不足為患

又曰初西南夷來歸即授原官其土官襲替必奉
朝命雖在萬里外皆赴闕受職天順末許土官呈
繳勘奏則威柄漸弛成化中令納粟備賑則規取

日陋孝宗雖發憤釐革而因循未改嘉靖九年始復舊制以府州縣等官隸驗封宣慰招討等官隸武選隸驗封者布政司領之隸武選者都指揮領之於是文武相維比於中土矣

又按明史土司傳首湖廣次四川次雲南次貴州次廣西而以廣東瓊州附於後皆明世所謂西南諸蠻也憲宗成化十八年馬平主簿孔性善上言溪峒蠻獠雖常梗化亂豈無因昔陳景文為令猺

獲皆應差徭厥後撫字乖方始仍反側誠使守令得人示以恩信諭以禍福亦當革心帝嘉納之惜未能實究其用此可為治蠻之寶鑑矣

湖廣土司

臣等謹按明史湖廣土司曰施州曰永順曰保靖今以一統志考之則施州即今之施南府屬湖北永順即今之永順府屬湖南保靖則今為縣屬永順府在明世則皆謂之湖廣蠻者也

明太祖洪武三年湖廣慈利土官構諸蠻入寇官軍平之

先是帝克武昌湖南諸郡望風歸附元時所置宣慰安撫長官司之屬皆先後迎降授以原官已而梗化至是慈利安撫使覃厓連構諸蠻入寇征南將軍周德興討平之五年復命鄧愈為征南將軍率師平散毛等三十六洞而副將軍吳良復平五開古州諸蠻凡二百二十三洞籍其民一萬五千收聚潰散士卒

四千五百餘人平其地未幾五開五谿諸蠻亂討平之十八年五開蠻吳面免反勢獷甚命楚王楨等擊斬九谿諸處蠻獠俘獲四萬餘人諸苗始懼而靖沅道澧之間十年內亦尋起尋滅雖開國之初師武臣力實帝控制之道恩威備焉永樂初苗告繼絕襲冠帶益就銜勒垂百年而五開銅鼓間又紛紛多警

臣等謹按湖廣土司傳湖南古巫郡黔中地也其施州衛與永保諸土司境介於岳辰常德之西與

川東巴夔相接壤南通黔陽谿峒深阻易於寇盜
元末滋甚陳友諒據湖湘間噉以利資其兵為用
諸苗亦為盡力有乞兵旁寨為之驅使者友諒以
此益肆及太祖殲友諒於鄱陽進克武昌湖南諸
苗乃歸降然此後實叛服不常云

景帝景泰初年蠻賊侵掠黔楚諸郡邑

時英宗北狩中原所在侵擾苗勢殊熾總兵官宮聚
奏賊西至貴州龍里東至湖廣沅州北至武岡南至

播州之境不下二十萬圍困焚掠諸郡邑而所領官
軍不及二萬前後奔赴不能解平越之圍乞急調京
邊軍及征麓川卒十萬以資調遣久而師徵不至更
易他帥浸淫六七載至天順元年總督石璞調總兵
官方瑛始尅期征勦破天堂小坪墨溪二百二十七
寨禽偽王侯伯等百餘人斬賊首千四百餘級奪回
軍人男婦千三百餘口於是苗患漸平

明史土司傳曰苗患萌發於貴州而蔓延於湖南

皆生苗為梗諸土司初無動搖而永保諸宣慰世
席富強每遇征伐輒願荷戈前驅國家亦賴以捷
伐故永保兵號為號堆嘉隆以還徵符四出而湖
南土司均備臂指矣

施州

明太祖洪武十四年命改施州為衛

施州隋為清江郡改施州明初仍之至是改為衛置
軍民指揮使司屬湖廣都司領軍民千戶所一曰大

田領宣撫司三曰施南曰散毛曰忠建領安撫司八
曰東鄉五路曰忠路曰忠孝曰金峒曰龍潭曰大旺
曰忠峒曰高羅領長官司七曰搖把峒曰上愛茶峒
曰下愛茶峒曰劍南曰木冊曰鎮南曰唐崖領蠻夷
長官司五曰鎮遠曰隆奉曰西坪曰東流曰臘壁峒
又有容美宣撫司者亦在境內領長官司四曰椒山
瑪瑙曰五峰石寶曰石梁下峒曰水盡源通壩平初
帝卽吳王位甲辰六月湖廣安定宣撫使向思明遣

長官硬徹律等以元所授勅印來上請改授乃命仍置安定等處宣撫司二以思明及其弟思勝為之又置懷德軍民宣撫司一以向大旺為之統軍元師二以南木渚仲玉為之抽攔不用黃石三洞各置長官一以沒葉大蟲硬徹律為之斡平洞設元帥府一以向顯祖為之梅梓麻寮二洞各置長官一以向思明唐漢明為之皆新降者丙午二月容美洞宣撫使田光寶遣弟光受等以元所授勅印來上命光寶為四

川行省叅政行容美等處軍民宣撫司事仍置安撫
元帥治之並立太平臺宜麻寮等十寨長官司至是
宣寧侯曹良臣帥兵取桑植容美洞元施南道宣慰
使覃大勝弟大旺副宣慰覃大興光寶子答谷等皆
來朝納元所授金虎符命施州宣慰司東鄉諸長官
司以流官參用五年忠建元帥墨池遣其子驢吾率
所部溪洞元帥阿巨等來歸附納元所授誥勅置忠
建及沿邊溪洞長官司以墨池等為之二月征南將

軍鄧愈平散毛柿谿赤谿安福等三十九峒散毛宣
慰司覃野旺上偽夏所授印十五年江夏侯周德興
移師討水盡源通塿平散毛諸峒置施州衛軍民指
揮使司十五年置施南宣撫司隸施州衛十七年覃
野旺子起刺來朝命為本司僉事景川侯曹震言散
毛等洞蠻時寇掠為民患如招之再負固請發兵討
二十二年命忠建宣撫司田忠孝代父職時其父思
進年八十餘乞致仕故有是命明年涼國公藍玉克

散毛洞禽刺惹長官覃大旺等萬餘人置大田軍民
千戶所隸施州衛以藍玉奏散毛鎮南大旺施南等
洞蠻叛服不常黔江施州衛兵相去遠難應援今散
毛地與大水田連宜置千戶所守禦乃改散毛為大
田命千戶石山等領土兵一千五百人置所鎮之時
忠建施南叛蠻結寨於龍孔玉遣將攻之禽宣撫覃
大勝餘蠻退走玉復分兵搜之殺獲男女一千八百
餘人械大勝及其黨八百二十人送京師磔大勝於

市餘戍開元給衣糧遣之

成祖永樂四年三月命改散毛施南仍為宣撫司

先是洪武初諸土司長官來降者皆予原官蠻苗吳面免之難諸土司地多荒廢長官亦罷承襲至永樂二年故土官之子覃友諒等以招復蠻民請仍設治所以其戶少降為散毛施恩長官司隸大田千戶所是年覃友諒覃添富來朝仍改為宣慰又龍潭安撫田應虎來言其祖父自宋元來俱為安撫自蠻亂併

其地入散毛隔遠難治乞仍舊從之又高羅安撫田
大民言招復蠻民四百餘戶乞還原職治所木冊長
官田谷佐唐厓長官覃忠孝並言父祖世為安撫洪
武時大軍平蜀民驚潰治所廢今谷佐等招集三百
餘戶請襲許之五年正月鎮南長官覃興等來朝稱
係世職洪武中廢今招徠蠻民三百戶乞仍舊既五
峰石寶長官張再武亦以襲職請從之同時設東鄉
五路安撫以覃忠為之隸施南設石梁下峒椒山瑪

瑤水盡源通塢平三長官司以向潮文劉再貴唐思
文為之隸容美既復設忠路忠孝金峒三安撫隸施
州衛以軍英田大英覃添貴為之皆因洪武間蠻亂
民散廢其治今忠等以故官子姪來朝奏請復設並
從之

宣宗宣德二年設劍南長官司等皆以其酋長為之
先是忠路安撫司等各奏前元故土官子孫年酋蠻
等各擁蠻民久據谿洞今就招撫請設官司授以職

事帝以馭蠻當順其情所授宜有等殺部議四百戶
以上設長官司四百戶以下設蠻夷官司元土官子
孫量授以職遂設劔南長官司隸忠路安撫搖把峒
上愛下愛二茶峒三長官司及鎮邊隆奉二蠻夷官
司皆隸東鄉五路安撫東流臘壁峒二蠻夷官司隸
散毛宣撫石關峒長官司西坪蠻夷官司隸金峒安
撫皆授其酋長從所招官司管屬

世宗嘉靖三十三年詔湖廣川貴總督并節制容美十

四司

初容美土司田世爵與把隘土官向元楫累世相仇
元楫幼世爵佯為講好以女嫁之謀奪其產因誣元
楫以奸有司恐激變令自捕元楫下獄論死世爵遂
發兵盡俘向氏并籍其土皆沒入之久之撫按知其
謀責與元楫對狀世爵不出陰與羅峒土舍黃中等
謀叛於是湖廣巡按周如斗請移荆南道分巡施州
衛以便控制調廣西清浪等戍軍以實行伍督臣馮

岳等言施州地勢孤懸不可久居戍軍亦非一時可
集當移荆瞿守備於施州九永守備於九谿上荆南
道備巡歷至世爵驕橫有司不能攝治獨久繫元楫
何為宜假督臣以節制容美之權問世爵抗違之罪
如不悛即繩以法從之

穆宗隆慶四年金峒土舍覃壁作亂傷官軍命所司相
機勦撫

時撫按請治失事諸臣罪兵部言本衛孤懸境外事

起倉猝宜從寬貰以責後功帝然之故有是命五年
巡撫劉慤以覃壁平條陳五事一以川東所轄巫山
建始黔江萬縣改屬上荆道一以荊州去施州衛遠
不便巡歷夷陵西有傳友德所闢取蜀故道名百里
荒者抵衛僅五百餘里請以巴東之石碕司巡檢施
州衛之州門驛三會驛並移近地俾閭井聯絡而於
百里荒及東卜壠仍創建哨堡令千戶一員督班軍
百人戍守一施州衛延袤頗廣物產最饒衛官朘削

致民逃夷地為亂宜裁通判設同知撫治民蠻均平
徭賦勿額外橫索一金峒世官不宜遽絕貨贖勝罪
降安撫為峒長聽支羅所百戶提調一施州所轄十
四司應襲官舍必先白道院始許理事其擅立名號
者請嚴治并令兵巡道每歲經歷施州預行調集各
官舍獎諭令赴學觀化俱從之

神宗萬厯十一年命施州衛施南等宣撫各官仍聽鎮
筭參將節制

從湖廣撫按所奏載入勅書以一事權

明史土司傳曰崇禎十二年容美宣撫田元疏言
六月間撫治兩臣調用土官臣即捐行糧戰馬立
遣土兵七千令副長官陳一聖等將之前行悍軍
鄧維昌等憚征調遂與譚正賓結七十二村鳩銀
萬七千兩賂巴東知縣蔡文陞以逼民從軍之文
上報阻忠義而啓邊釁命撫按核其事時中原寇
盜充斥時事日非即土司徵調不至亦不能問矣

永順

明太祖洪武五年命置永順等處軍民宣慰使司

時永順宣慰使順德汪倫堂厓安撫使月直遣人上其所受偽夏印詔賜文綺襲衣遂有是命領湖廣都指揮使司領州三曰南渭曰施溶曰上溪長官司六曰臘惹洞曰麥著黃洞曰驢遲洞曰施溶溪曰白崖洞曰田家洞

臣等謹按明史土司傳曰永順漢武陵隋辰州唐

溪州地也宋初為永順州嘉祐中溪州刺史彭仕義叛臨以大兵乃降熙寧中築下溪州城賜名會溪元時彭萬潛自改為永順等處軍民安撫司此時明命建置亦仍其名

英宗天順二年諭永順土官調兵會勦貴州東苗

至成化三年又調永順兵征都掌蠻十三年以征苗功宣慰彭顯英進階獎勞弘治七年以貴州平苗功宣慰彭世騏進階褒獎十四年世騏以北邊有警請

帥土兵一萬赴延綏助討賊部議不可賜勅獎諭并
賜奏事人路費鈔千貫免其明年朝覲以方聽調征
賊婦米魯故也

武宗正德六年永順土舍彭世麟以計禽四川賊捷聞
獎賚有差

四川賊藍廷瑞鄔本恕等及其黨二十八人倡亂兩
川烏合十餘萬人僭王號置四十八營攻城殺吏流
毒黔楚總制尚書洪鍾等討之不克已而為官軍所

逼乏食乃佯聽撫劫掠自如廷瑞以女結婚於世麟
世麟偽許之因與約期廷瑞本怒及王金珠等二十
八人皆來會世麟伏兵禽之餘賊渡河官兵追斬及
溺死者七百餘人總制巡撫以聞各加獎賚論者以
是役世麟為首功明年賊劉三等自遂平趨東臯宣
慰彭明輔等以土軍追擊之賊倉卒渡河溺死者二
千人斬首八十餘級事聞命永順宣慰格外加賞仍
給明輔誥命嗣是有保靖兩宣慰爭兩江口之議詞

連明輔主者議逮治明輔乃令蠻民奏其從征功悉
辭香爐山應得陞賞以贖逮治之辱部議悉已之嘉
靖六年論禽岑猛功免應襲宣慰彭宗漢赴京而加
宗漢父明輔祖世騏銀幣

世宗嘉靖三十三年十二月調永順土兵協勦倭賊於
蘇松

明年永順宣慰彭翼南統兵三千致仕宣慰彭明輔
統兵二千俱會於松江時保靖兵敗賊於石塘灣永

順兵邀擊賊奔王江涇大潰保靖兵最永順次之帝
降勅獎勵各賜銀幣

明史土司傳曰先是永順兵勦新場倭倭故不出
保靖兵為所誘遽先入永順土官田畱田豐等亦
爭入為賊所圍皆死之及王江涇之戰保靖犄之
永順角之斬獲一千九百餘級倭為奪氣蓋東南
戰功第一云

神宗萬曆二十五年調永順兵赴援遼東

時東事急調永順兵萬人赴援宣慰彭元錦請自備
衣糧聽調既而支吾有要挾之迹命罷四十七年兵
部言前調元錦兵三千人援遼已半載到關者僅七
百餘人命究主兵者至次年以檄調八千僅以三千
塞責又上疏稱病為巡撫所劾得旨切責元錦不得
已行兵抵通州北聞三路敗衄遂大潰於是巡撫徐
兆魁言調兵八千費踰十萬今奔潰虛糜無益罷之

保靖

明太祖洪武元年詔升保靖安撫司為宣慰以其酋為之

保靖唐溪州地宋置保靜州元為保靖州安撫司明太祖初起時彭世雄率屬歸附命仍其舊官至是以彭萬里朝貢乃升為宣慰

宣宗宣德四年七月命擇衆所推服者為保靖宣慰司先是永樂初以保靖族屬大蟲可宜等互仇殺遣使齎勅撫諭之三年辰州衛指揮龔能等招諭草子坪

等三十五寨生苗廖彪等因設箐子坪長官司以彪
為之十二年箐子坪賊吳者泥自稱苗王與蠻民苗
金龍等為亂官軍平之未幾者泥子吳擔竹復誘苗
吳亞麻糾貴州答意蠻叛亦平之至是兵部奏保靖
舊有二宣慰一為人所殺一為殺人當死其同知以
下官皆缺請改流官治之帝以蠻性難馴流官不諳
土俗故有是命

孝宗弘治十二年保靖土官相仇殺諭鎮巡官速勘以

聞

從永順宣慰司奏也初彭萬里授宣慰領白崖大別
大江小江等二十八村寨萬里卒子勇烈嗣勇烈卒
子藥哈俾嗣年幼萬里弟麥谷踵之子大蟲可宜殺
之而據其十四寨其後勇烈之弟勇傑嗣傳子南木
杵孫顯宗曾孫仕壠與大蟲可宜之子忠忠子武武
子勝祖及其子世英代為仇敵而武於正統中隨征
有功授兩江口長官勝祖於成化中亦以功授前職

並隨司理事無印署弘治初勝祖年老世英無官恐
仕瓏奪其地援例求世襲奏行覈實仕瓏輒沮之以
是仇恨益甚兩家所轄土人亦各分黨仇殺永順宣
慰使彭世麒取勝祖女復左右之互相攻擊奏訴無
寧歲廷議世英歸所據小江七寨於仕瓏止領大江
七寨聽仕瓏約束其原居兩江口係襟喉要地請調
清水溪堡官兵守之而徙世英於沱埠以絕爭端奏
上從之此弘治十六年六月事也至正德十四年兩

江口土舍彭惠與宣慰彭九霄復構怨永順宣慰彭明輔與之連姻助以兵力遂與九霄往復仇殺數年不息死者五百餘人前後訴奏累八十餘章守巡官繫惠於獄明輔率衆劫之去尋復捕繫詔都御史吳廷舉勘處請以大江之右五寨歸保靖大江之左二寨屬辰州設大刺巡檢司流官一人主之惠免遷徙仍居沱埠以土名目協理巡檢事部覆從之

世宗嘉靖三十三年詔調保靖土兵征倭

命宣慰彭蓋臣帥所部三千人赴蘇松明年遇倭於
石塘灣大戰敗之賊北走平望諸軍尾之於王江涇
大破之錄功以保靖為首勅賜蓋臣銀幣并三品服
令統兵益擊賊先是保靖兵追倭至新塲倭二千人
伏不出土舍彭翹引軍探之中伏與所部皆死贈翹
一官并賜棺殮具及王江涇捷進蓋臣為昭毅將軍
既復加右參政管宣慰司事

神宗萬曆四十七年命調保靖土兵援遼

明年宣慰彭象乾親統兵五千至涿州病中夜兵逃散者三千餘人嚴旨責統兵者并勅監軍道沿途招撫明年象乾病不能行遣子姪率親兵出關戰於渾河金軍皆歿天啓二年進象乾都督僉事贈彭象周親天祐各都司僉書以渾河之役一門殉戰義烈為諸土司冠

欽定續文獻通考卷二百四十